

Nilo Croes a fayece

Diamars merdia a yega e triste noticia cu abogado mr. Nilo Croes a fayece. Manera ta conoci, cu desde luna di October, Nilo a bira hopi malo y a cuminza un bataya contra cancer. Sinembargo ayera el'a fayece di un posibel atake di curazon na hospital mes, momento cu el'a acudi pa haci test.

SOLO DI PUEBLO y nos otro medio TOP 95 FM ta manda palabranan di profundo condolencia na su yiunan, mama di su yiunan y su pareha. Tambe na Juffrowu Gloria Croes, kende ta colaborador di SOLO DI PUEBLO desde 2005. Tambe ta extende condolencia na demas famianan.

Nilo tabata un gran sostenedor di Partido MEP, desde tempo di Betico y tabata "cabay di campanja" pa Betico. Despues Nilo a sigui pa un temporada na Hulanda unda ela termina su estudio di ley pa despues bira abogado.

Nilo tin 20 aña ta colaborando cu TOP 95 FM, como moderador di e programa radial Interes di Pueblo. Tabata na 1996 estando na Corsow, cu Nilo hunto cu Edmond a concretisa e acuerdo pa Nilo presenta e programa

Interes di Pueblo. Pa 20 anja largo, den forma consistente, Nilo a sa di entretene nos pueblo cu topiconan alcaso, fuerte, critico, pero tambe tabata sa di duna elogio na cualkier obra cu tabata merece.

Den seno di TOP 95 FM, ainda hopi no por kere cu e trayecto di Nilo a bay asina repentino, debi cu ainda na luna di September, maske cu e tabata poco malo, e tabata acudi na radio pa presenta su programa.

Pues, nunca su coleganan por a biba y pensa cu den un tempo asina corto, nan lo mester despedi di Nilo.

Nos redaccion a aserca nos director Sr. Edmond Croes, kende a bisa nos: Nos ta conmovi y hopi tristo cu e despedida di Nilo. Nilo tabata un bon amigo di nos tata Everaldo y hunto nan hiba campananan fuerte pa Betico pa asina por a logra Status Aparte. Tempo mi tabata mas chikito, te hasta nos a biaha hunto pa Merca y disfruta un dushi vakantie. Despues na otro ocasion ma biaha cu Nilo pa Miami atrobe pero tambe na dos of tres ocasion ma biaha cu Nilo



pa Hulanda pa bay celebra Arubadag. Nos tin gratonan recuerdonan di Nilo, cu semper a trata nos manera un yiu cu tabata conseha nos riba tur tereno huridico. Ta duel mi su despedida asina lihe", tabata

parabanan di Edmond Croes, cu a reacciona riba e pregunta di nos redaccion.

SOLO DI PUEBLO y nos otro medio TOP 95 FM lo ta pendiente pa e entiero di Nilo, unda nos lo trece programanan special.